

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqummiuppara:

**Meeqqat atuarfiani naammassisut inuuniarnermikkut piginnaasakkullunniit patsiseqartumik ilinniagaqalinngitsoortartut perorsimanerulernissaat piginnaangorsarnissaat piunmassuseqarnerulernissaallu siunertaralugu Naalackersuisut misissuinissamik aallartitseqqullugit Inatsisartut aalajangiiffigisassaattut siunnersuut. Misissuineq 2015-imi upernaakkut ataatsimiinnermi nalunaarusiamik agguaassinermik inerneqassaaq.**  
(Inatsisartunut ilaasortaq Evelyn Frederiksen, Siumut)

**Tunngavilersuut:**

Ullumikkut meeqqat 16-it missaanni ukioqaleraangamik meeqqat atuarfiannit soraarummeertarput, naallu amerlaneruartortut ilinniagaqalersaraluartut, ullumikkut arlallitilinniakkamik aallartitsinngitsoortarput, imaluunniit nunatsinni danmarkimiluunniit efterskolimi aallartittarlutik. Tamanna arlalinnik patsiseqarsinnaasarpoq, matumanilu soorlu inuuniarnikkut ajornartorsiuteqarneq, angusalunneq imaluunniit inerisimanggissuseq patsisaasinnaasarput – ullumikkullumi taakku sooq meeqqat atuarfianni soraarummeerneramik kingorna ingerlaqqinngitsoortarnerisut sukumiisumik ilisimasaqarfiginngilarput, taakkuli amerlavallaarput. Nalunaarusiami “Siunissami ilinniarsimasuunissaq”, april 2012-imeersumi inuusuttuni ukioqatigiiaani tamanit 50 %-it meeqqat atuarfianni naammassinninnermit ukioq ataaseq marlulluunniit qaangiukkaangata aallartinngitsoortartut allassimavoq. Tamanna pitsaanngilaq!

Naalackersuisut ilinniartitaaneq pillugu pilersaarutaanni “Piareersarfiusumik ilinniartitaanerit, inuusuttullu ilinniartitaaneri” sammisaaq 1-iuvoq. Inuusuttut amerlasuut meeqqat atuarfiannit soraarummeerneramik kingorna assigiinngitsunik patsiseqartumik ilinniakkamik aallartitsinngitsoortarnerat tassani patsisaavoq. Taamaalilluni inuusuttut akuttunngitsumik piareersarfiusunik ingerlatsisarput, soorlu efterskolernerit ukiorluunniit ataaseq GU-mi atualernissamut piareersarneq, atuarfimmi angusanik pitsanngorsaavusartut.

Periarfissat taakku atuunnerat ajunngilluinnartuuvoq, nalunngilarpummi ilinniakkamik aallartitsinissaq suliffeqalernissarlunniit pingaaruteqartut, taamaattoqanngippammi inuusuttut unittuinnerannik tamanna kinguneqarsinnaavoq, tamannalu inuiaqatigiinnut tamarmiusunut inuusuttumulluunniit namminermt pitsaasuunngilaq.

Pissutsit nakeriallannarput, inuiaqatigiittulli uagut pitsaanerusumik iliuseqartariaqarpugut. Inuusuttunummi meeqqat atuarfiannit aneqqammersunut amigartunik neqerooruteqartarneq pissutsinik pitsaanerulersitsinngilluinnarpoq – inuusuttummi suliffissaaleqisutut nalunaarsorneqarnissamut ukiukippallaarput, amerlasuutigullumi aamma Piareersarfinni

højskoliniluunniit tiguneqarsinnaaneq ajorput, tassanilu 18-inik ukioqalereersimanissamik piunasaqarneq imaluunniit annertuumik soqutiginninneq pissutigalugu utaqquisut amerlavallaarnerannik tamanna patseqarsinnaavoq.

Inuusuttut uninngaannarnissamut ilinniartissanngilagut. Inuusuttut sulillutilluunniit ilinniagaqalersimanissaat anguneqarsimasariaqarpoq. Periarfissat taakkunanga allaaneruset akuersaartariaqanngilluinnarpagut. Immitsinnut, meerartatsinnut, ilaqtutatsinnut ikinngutitsinnullu taama piunaffiginnittariaqarpugut.

Taamaammatt inuusuttut ilinniagaqalinngitsoortut assersuutigalugu 11. klassip atuutilerseqqinneratigut assingusumilluunniit aaqquissuussinitsigut allanik periarfissittariaqarpavut.

Siuliani taaneqareersutut ullumikkut pikkorissaanerit assigiinngitsut inuusuttunut ilinniagaqalinngitsoortunut sammititat ingerlanneqartarput, taakkuli siaruarsimavallaarput piffissamilu killilimmi aningaasaliinikkut ingerlanneqartarlutik, taamaamallu nunamut tamarmut atuutsitamik eqqarsaatigilluakkamik siunissamullu qulakkeerinnittumik periarfissaq maqaasinarpog - taamaalillutami inuusuttut siunnersuummi matumani sammisakka annaassanngilavut.

### **Siunnersuutip aningaasatigut allaffissornikkullu pisortanut kinguneqaatissai**

Nalunaarusiassamik suliaqarnissap Namminersorlutik Oqartussanut allaffissornikkut aningaasartuuteqarfiunissaa ilimagineqarpoq. Suliassaq tamarmiuseq, nutserinertaa ilanngullugu AC-tut atorfillipukioq affarmik ukioq ilivitsog angullugu akissarsiaanik naleqassangatinneqarpoq, tamannalu 250.000 – 500.000 kr-inik annertussuseqassangatinneqarpoq.

Siunnersuummut atatillugu aningaasalersuinissamik siunnersuuteqannginnera pillugu, naalakkersuisoqarfiup aningaasartuutissatut tagginneqartut taakku, allaffissornermut aningaasaliissutaareersut iluanni aningaasalersortariaqarpai. Tamannalu naalakkersuisoqarfimmi suliassanik allanik annikillilerinikkut pisinnaassaaq. Tamanna naalakkersuisoqarfiup inatsisit naapertorlugit isumagisassaasa saniatigut pisinnaassanngippaat, tamanna pillugu Naalakkersuisut akissuteqaamminni paasissutissiinissaat naatsorsuutigaara, taamaalillutimmi Inatsisartut kingorna siunnersuummut aningaasalersuutissanik isummersinnaaqullugit.

Ilinniagaqarnikkut suliniutinik taaneqartunik piviusunngortitsineq soorunami Namminersorlutik Oqartussanut kommuninullu meeqqat atuarfiannut akisussaasunut taamattaarlu ilinniagaqarnermik suliniuteqarnermut atatillugu annertuumik suliassaqtumut aningaasartuuteqarfiussaaq. Tamannali massakkuugallartoq missingerneqarsinnaanngikkallarpoq, tamannalu nalunaarusiami ilanngunneqassaaq.

### **Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai**

Soqanngilaq.

### **Siunnersuutip innuttaasunut allaffissornikkut aningaasatigullu kinguneqaatissai**

Nalunaarusiaq suliniutinik inuusuttut amerlanersuut uninngaannarnatik suliffeqalerlutilluunniit ilinniagaqalernerannik kinguneqassappat, tamanna innuttaasunut pitsaasumik kinguneqaateqassaaq.